



中国经典名著

全元曲·杂剧

宋太祖龙虎风云会

文 清 校正

学苑音像出版社

目 录

楔 子	1
第一折	2
第二折	6
第三折	12
第四折	19

楔 子

（石守信引王全斌、潘美及二小卒俱戎装上，诗云）
亲统貔貅百万兵，兜鍪日日侍承明。朝梁暮晋何时了，定许将军见大平。下官姓石，双名守信，大梁人氏。方今周世宗登基，四方扰攘，干戈不息。为我累建大功，升授马步亲军都指挥使，统领着八十万禁军，得专征伐。近奉圣旨，招募智勇之士，量才授职。这一人乃王全斌，这一人乃潘美，见充帐前统制官，与我八拜兄弟，一同调遣。兄弟，但有知识，当为国引进咱。（王全斌云）哥哥，今有马军副指挥使赵弘殷长男赵匡胤，文武全才，智勇过人，少年游历关东关西，独行千里。若得此人统领军马，荡除草寇，何愁天下不太平也。（石云）兄弟，既有如此贤才，何不早说？可备礼帛鞍马，差人敬征聘者。（王云）差谁去请？（石云）可就差统制官潘美走一遭去。左右，将礼币鞍马过来。（二卒捧段帛盔甲上，随定潘美）（石云）疾去早来者。（潘云）得令。（下）（石唱）

【仙吕】【赏花时】 两只手揩磨日月新，一片心扶持天地稳。向千万里展经纶，把狼烟扫尽，直教龙虎会风云！

（云）潘美去了也，咱也去来。（下）



第一折

(正末赵匡胤引赵普、郑恩、曹彬、楚昭辅常服上，诗云)平生踪迹遍天涯，四海原来是一家。涂炭生民谁拯救，何时正统立中华。某姓赵名匡胤，乃指挥弘殷之子。自幼好使枪棒，攻习韬略，游历关陕，结识天下知名之士。这个是幽州赵普，曾参随我父四方征伐，充帐前判官；这一人乃曹彬，灵寿人氏；这一人乃郑恩，大梁人氏；这一人乃楚昭辅，宋州人氏，皆与我相交至密，结为兄弟，虽古之关张，不过如此。今日无事，在此闲行了一会。众兄弟，权此告别，明日再会。(齐下)(苗光裔道服上，诗云)先天成数久精通，八卦循环掌握中。岁在庚申天下定，乾元九五见真龙。某姓苗名训，字光裔，大梁人氏。自幼习《周易》先天之数，兼通星纬之学。如今周朝世宗登基，国步多艰，某因此隐于草泽，以卖卜为生。我见王气正兆大梁，必然有真命帝主出世。我今在汴梁桥下开张卦肆，打扫干净，看有甚么人来。(做铺卦小桌上科，正末引郑恩常服上，云)兄弟，咱别了众兄弟，行来不觉将至城中也。(郑云)哥哥如此武艺双全，何不求试，为国家出力，也得图形麟阁上。(正末云)兄弟，你怎生知我也呵！(唱)

【仙吕】 【点绛唇】 四海为家，寸心不把名牵挂。
待时运通达，我一笑安天下。

【混江龙】 见如今奸雄争霸，漫漫四海起黄沙。递



相吞并，各举征伐。后汉残唐分正统，朝梁暮晋乱中华。豺狼掉尾，虎豹磨牙；尸骸遍野，饿殍如麻；田畴荒废，荆棘交加；军情紧急，民力疲乏。这其间，生灵引领盼王师，何时得蛮夷拱手遵工化，我只得纵横海内，游览天涯。

（郑云）哥哥，不觉行至汴梁桥下。前面是一卦铺，咱教那先生算一卦如何？（正末云）也使得。（见苗科，云）先生拜揖！（苗做慌跪科，云）早知我主到来，只合远接，接待不着，勿令见罪。（正末喝云）先生，你胡说！（苗云）臣相人多矣，主公乃九朝八帝班头，四百年开基帝主。（正末云）先生，莫不你吃酒来？（唱）

【油葫芦】莫不你酒力禁持眼界花？请先生再觑咱，我须不是金枝玉叶那根芽。（苗云）主公尧眉舜目，禹背汤肩，真乃帝王之相也。（正末唱）你道我尧眉舜目堪图画，汤肩禹背实稀诧。（苗云）主公正应九五飞龙在天之数。（正末唱）头直上又没一片云，浑身上又没万缕霞。你道我乾元九五飞龙卦，多管是相法内有争差。

【天下乐】我本是粗鲁寻常百姓家，休夸！则管里迤逗杀，这言词早合该万剐。市廛中人物稠，墙壁间耳目杂，但听的不是耍！

（正末指郑云）你相我这个兄弟咱。（苗云）这个丑人是一个凶神太岁，不过是一路诸侯。（郑云）这先生好无礼，如何说我是凶神太岁？兀的不气杀我也！（正末唱）



【醉中天】 平白地相惊唬，到大来厮蹉跎，早则么话不投机一句差，（郑云）气杀我也！他怎敢说我？杀了这个牛鼻子。（正末唱）把心上火权时纳。到晚来把天文看咱，明朗朗众星高曜，不如你孤月光华。

（潘美引二卒将礼币、戎衣上，云）奉元帅将令，聘礼贤士赵匡胤。寻了这一日，到卦铺中，兀的不是！我索过去。（做见科，云）赵公子拜揖！先生拜揖！适蒙石元帅钧旨，因统制官王全斌举荐阁下有文武全才，径差潘美赍礼币鞍马，前来聘请赴京授职，阁下只索就行。（苗云）这位君子也是上界星象，一路诸侯之命。（正末云）将军一貌非俗，但不知年甲几何？（潘云）念潘美年二十二岁。（正末云）某长两岁，就此拜为兄弟，有何不可！（潘云）既蒙兄长错爱，敢不尽心报答！（正末拜唱）

【那吒令】 知心的最多，谁如叔牙？知音的最多，谁如伯牙？知兵的最多，谁如子牙？龙蛇混甚日分，豺虎乱何时罢？争名利使尽奸猾。

【鹊踏枝】 这个待把云拿，那个早被天罚；气昂昂创业开基，眼睁睁败国亡家。一任教纵横奋发，都是些井底鸣蛙。

【寄生草】 传正道无夫子，补苍天少女媧。因此上黎民饿死闾阎下，贤能埋没林泉下，忠良枉死刀枪下。乱纷纷国政若抔沙，虚飘飘世事如嚼蜡。



(潘云)元帅将令紧急，须索走一遭。(正末云)先生拜别。(做行到科，潘云)哥哥稍待，兄弟先通报去。(潘见石跪云)早蒙元帅钧旨，礼聘贤士赵匡胤，已到军前听令。(石云)着进来。(潘唤正末进见科，石云)贤士姓甚名谁，家乡何处，曾习武艺不曾？(正末云)念在下姓赵名匡胤，副指挥弘殷之子。自幼习成武艺一十八般，韬略兵法，无所不通。(石云)你细说我听咱。(正末唱)

【醉扶归】 敢把征鞍跨，兵器惯曾拿。甲马营中是俺家，(石云)既如此就留在辕门听用咱。(正末拜，唱)谢元帅相留纳。(石惊起科，末又拜，唱)请稳坐安然受咱，容参拜阶墀下。

(石又惊起，云)贤士乃有福之人，小官不觉惊慌，不敢受礼。贤士试将武艺说一遍我听咱。(正末唱)

【金盏儿】 论弓箭不曾差，使剑戟颇熟滑。提一条杆棒行天下，十八般武艺非敢道自矜夸。折末枪刀并剑戟，鞭简共椎槌。往常学成文武艺，今日与货与帝王家。

(石云)既如此，今日将引贤士赴阙，见帝封官去咱。(正末云)今日拜识元帅，又蒙引进，当尽心报国。(石云)左右，门首看有甚么人来。(赵普上，云)自家赵普是也。自从在赵都指挥帐下，结义大公子为弟兄。想昔日大公子游随州时，客于董宗本家，其子董遵诲常梦黑蛇十数丈变龙飞去，既而群虎乘风随之，人见紫云如盖，凝结城上，



今日有人传说，元帅石守信聘大公子授官面帝，风云之梦，信有征也！只索奉饯一遭。来到这军门前，左右通报，说判官赵普见。（卒子报科，石云）着他进来。（普云）元帅拜揖！大哥拜揖！呀、呀，哥哥可喜也，小弟特来奉饯。此行功名不小也。（正末唱）

【赚煞】 向边塞建功勋，赴京阙朝銮驾，直叩君王御榻。长朝殿太平筵宴罢，出宫庭拥大纛高牙。天街上摆头答，醉醺醺把金镫斜踏。稳坐逍遥玉骢马，马头前对挑着绛纱。纱笼内齐烧着银蜡，那其间任香风吹落帽檐花。（同下）

第二折

（苗光裔儒扮上，楚昭辅戎装随上，苗云）某苗光裔是也。自从前者相得赵大公子有天子之分，不想被朝廷礼聘，见授都点检之职。某一向就在军门听用，近日闻得北汉兵入寇，朝廷命点检出师北伐，某等亦须收拾军装则个。呀、呀，好怪也！你看日下复有一日，黑光相荡，此天命也。咱弟兄每急急回家，准备出征则个。（下）（太后宫妆法服引幼主黄袍及石守信戎装、陶谷文扮上，云）我乃周家太后是也。自从先帝世宗晏驾，立此幼子宗训为君。四方扰攘不宁，近闻汉、辽兵自土门东下入寇，我朝有殿前都点检赵匡胤，文武全才，乃先帝简用之臣，又兼他手下将校精强，可着他去征伐一遭。石守信即便传旨，着赵匡胤挂



印总兵官，率领本部人马，北征辽、汉，早建大功者。（石云）领圣旨。（并下）（正末戎装引赵普、曹彬、苗训、楚昭辅、李处耘、郑恩上，云）某赵匡胤是也。自从元帅石守信举荐，蒙世宗皇帝委任，直做到殿前都点检之职，多亏众兄弟扶持。今日蒙幼主圣旨，着我统兵北伐。我引本部下人马及众将校赵普、曹彬、苗训、李处耘、楚昭辅、郑恩，一同征进。这一去，犬羊巢穴一时平，锦绣江山三箭定。（唱）

【南吕】【一枝花】 漫漫杀气飞，滚滚征尘罩。恹恹红日惨，隐隐阵云高。军布满荒郊，我命将凭《三略》，行兵按《六韬》。右白虎左按青龙，后玄武前依朱雀。

【梁州第七】 护中军七层剑戟，守先锋万队枪刀，五方旗四面相围绕。朱幡皂盖，黄钺白旌，箭攒雕羽；弓挂龙弥。滴溜溜号带齐飘，威凛凛挂甲披袍，扑咚咚鼓擂春雷，雄纠纠人披绣袄，不刺刺马顿绒绦。咆哮！战讨！马和人飞上红尘道。金镫稳，玉鞭袅，催动龙驹把辔摇，转过山腰。

（云）行不几里，又早天晚也。（唱）

【牧羊关】 见几点寒星现，一钩新月皎，看看的兵至陈桥。教前队休行，催后军赶着。屯军仗，离军道，就馆驿，度今宵。疾忙教各部下关粮米，对名儿支料草。



(正末云)左右，军行到何处了？(众云)前到陈桥驿了。(正末云)接了马者。郑恩那里？(郑云)有。(正末云)传下将令去者：大小三军，诸名将校，各依队伍安歇。勿得喧哗，违令者斩！（唱）

【贺新郎】 诸军众将一周遭，小心的下寨安营，在意的提铃喝号。七禁令五十四斩从公道，叮咛，休犯法违条。卷旌旗停斧钺，卧鞭链竖枪刀，悄悄的各依队伍休喧闹。解鞍松战马，卸甲脱征袍。

【隔尾】 五更筹更听金鸡报，一部从休辞永夜劳。画角齐吹玉梅调。人休贪睡着，马须要喂饱，我且半倚帟屏盼天晓。（众下）

(正末睡科)(郑同李处耘上，云)某都押衙李处耘是也。今同郑将军等跟随赵点检征进，军次陈桥驿。某等想来，主上幼弱，我辈出死力破贼，谁则知之！今太尉掌军政六年，士卒服其恩威，数从征伐，建立大功，人望已归。不如先立点检为天子，然后北征未晚也。(郑云)李将军说的是。(李云)咱与赵书记计议则个。(郑云)赵大人有请。(赵普上，云)某赵普是也，见充点检帐下掌书记官。今日从征，军次陈桥。这早晚只听有人呼唤，未免出见咱。(做见科，李云)诸将无主，愿册太尉为天子。(普云)太尉忠心，必不汝从。(李云)军中偶语则族，今已议定。太尉若不从，则我辈安敢退而受祸！（普叱云）策立大事，固宜审图，尔等何得更挂狂悖！诸将各宜严束部伍听命。(郑云)



若依你等议论，何时是了？（扯黄旗盖末身，众呼噪科）（正末惊醒科，唱）

【哭皇天】 把好梦来惊觉，听军中不定交。那里也兵严刑法重，则末早人怨语声高。（众军一拥向前齐呼万岁）（正末唱）险将咱唬倒，庙廊召会，台省所关；君王振怒，太后生嗔。不刺则俺这歹名儿怎地了？惊急列心如刀锯，颤笃速身如火燎。

（苗云）主公上应天心，下合人望，乃真命帝主也。（正末云）噤声！（唱）

【乌夜啼】 都是你谎阴阳惹得诸军闹，一个个该剐该敲。（郑云）哥哥，你先身上穿了黄袍，如何倒说俺不是？（正末唱）呀！原来这犯由牌，光把我浑身罩。（普云）天命已定，天数难逃，主公亦当应天顺人。（正末唱）你道是大数难逃，可甚么情理难饶？不争这杏黄旗权当袞龙袍，可将这《出师表》扭作交大诏。我想受禅台，争似凌烟阁？汝贪富贵，吾岂英豪！

（正末云）此事决不可行。（众将喧呼科，正末云）汝等自贪富贵立我为主，能从我命则可，不从我命，决不可行。（众皆跪云）唯命是听。（正末云）太后幼主，我北面事之；公卿大臣，皆我比肩。汝等勿得凌暴及动扰黎民，劫掠府库。违令者满门皆斩！（众云）一听禁令。（太后、幼主、石守信、陶谷上，云）昨因北汉入寇，遣赵点检出征，今



早闻众军士立赵点检为帝。我想来，四方不宁，必得真主抚驭。今赵点检威望素著，人心推戴久矣，何不就同往陈桥，效尧舜故事，禅位一遭，有何不可！（做行科，到科，云）来到这军门前，石守信入报去。（石云）报总兵得知，太后到来。（正末下，迎见科，太后云）五代乱离，人民涂炭，将军功盖天下，堪居大宝，老身母子情愿禅位则个。（正末云）臣名微德薄，岂堪居此大位？（太后云）幼子孤弱，不能抚驭四方；将军德过尧禹，正宜受禅。（正末唱）

【红芍药】 娘娘德行胜唐尧，微臣比虞舜难学。不争让位在荒郊，枉惹得百姓每评说。（幼主云）将军，听太后旨者，我愿受藩服足矣。（正末唱）臣怎敢等闲将天下交，您君臣再索量度。（郑恩仗剑作怒科）（正末唱）你摩拳擦掌枉心焦，休得要乱下风雹。

【菩萨梁州】 你可也畅好是干乔，休施凶暴。休胡为乱作，（郑云）哥哥，我一发都杀了，恰不伶俐！（正末唱）则一句唬得我颤钦钦魄散魂消。不争这老鸦占了凤凰巢，却不道君子不夺人之好！把柴家今日都属赵，惹万代史官笑，笑俺欺负他寡妇孤儿老共小，强要了他周朝。

（石云）今日就此受禅，必须有策诏方可行礼。（陶云）有、有。（自袖中出诏科，石云）既有了诏书，众官跪者。（陶念科，云）大周皇帝诏旨：天生蒸民，树之司牧。二帝推公而受禅，三主乘时而革命，其极一也。予末小子，遭家不造，人心已去，天命有归。咨尔归德军节度使、殿前



都点检赵匡胤，禀上圣之资，有神武之略，佐我高祖，格于皇天；逮事世宗，功存纳麓，东征西怨，厥功懋焉。天地鬼神，享于有德；讴歌狱讼，归于至仁。应天顺人，法尧禅舜，如释重负，予其作宾。呜呼钦哉！只畏天命。显德七年正月初五日。（众将呼万岁起科，正末云）众将校听我戒饬。（唱）

【二煞】 尊太后如母呵，您百官顿首听教导；待幼主如弟呵，教经典留心谨向学。朝廷内外旧官僚，勿得欺凌，尽皆荣耀。则今日军马回，莫惊扰，把龙袖娇民休唬着，勿犯秋毫。

【尾】（指赵）你坐都堂朝廷政事休差错，（指石）你掌枢密大下兵机勿惮劳。（指苗）你掌司天，算星曜，（指李、楚）你做元戎，司斩斫，（指曹、潘）你统雄兵，做招讨，（指郑）你管亲军，守城廓，（指王）你统貔貅，驱将校。（指幼主）兄弟诵诗书，习礼乐，（指太后）娘娘居龙楼，住凤阁。不是我倚势夺权，使强欺弱。既然立草为标，必须坐朝问道。赏不间亲疏，罚须分善恶，有罪的加刑，有功的赠爵。不是我挟天子令诸侯篡宗庙，恐民心变了，把山河弃却，因此上权受取这一颗交天传国宝。（众并下）

（吴越王引相国吴程冠服上，诗云）百万精兵听指呼，衣冠四世守全吴。我生直欲全忠节，不愧人间大丈夫。某姓钱名俶，字文德，本贯杭州人氏。自祖公公钱镠在唐昭宗时平黄巢有功，封有吴越，更五朝世守此邦。今闻中原



赵点检登基，治同尧舜，声教万里，比五代之君，判然不同。正四方混一之时，倘或出师。自当入贡咱。（吴云）等王师出来，决一死战，纳土未为迟也。（共下）（南唐李主引丞相徐铉上，诗云）雄据江东二百州，六朝基业喜兼收。中原将士休窥伺，百万精兵在石头。某姓李名煜，字重光，江东人也。自我祖父建国江东，传国三世。近闻中原大宋皇帝即位，操练兵马，有下江南之志；况我贡献不缺，必欲见伐，如何是好也？不免练兵防守则个。（下）（蜀主孟昶引相国王昭远上，诗云）几年辛苦下西川，东视中原各一天。秣马练兵常预备，先人世业肯轻捐！某蜀王孟昶是也。自先君王于全蜀，某承其基业，众官僚立我为大蜀皇帝。中原连岁多故，不暇外攘。今周朝革命，宋皇践祚，志在吞并，难同五代之君，诚恐兵临剑阁，将如之何？须索守备咱。（下）（南汉主刘鋹引相国龚澄枢上，诗云）久镇潮阳众日强，幅员千里尽炎方。外夷多少皆朝贡，南国人称广汉王。某姓刘名鋹，南汉王是也。自先祖领节旄于潮广，奄有南海，后值五代扰乱，遂独霸一方。今中原有宋皇帝登基，四方混一，唐吴已称朝贡。某偏居琼海，王师一出，将如之何？须扼把险要以御之，斯为得策。

第三折

（赵普衣冠引张千捧香、桌、书、烛上，云）某赵普是也。自从做掌书记时，扶佐当今皇帝，定有天下之号曰宋，四方承平。以某有推戴之功，官拜中书大丞相，进封韩王。



今夜雪下甚紧，料无人来。张千，你拿过香桌来，点上烛，我读一会《论语》咱。（张千云）我烧上些香，剔的灯亮亮的。老爹，你慢慢的看者。（正末纱帽常服上，云）某自从陈桥兵变，众兄弟立我为大宋皇帝，晓夜无眠，恐万民失望，诸国未平。今夜风雪满天，路无行客，寡人扮作白衣秀士，私行径投丞相府里，商量下江南、收川广之策。出的这禁城来，是好大雪也呵！（唱）

【正宫】【端正好】 光射水晶宫，冷透鲛绡帐，夜深沉睡不稳龙床。离金门私出天街上，正瑞雪空中降。

【滚绣球】 似纷纷蝶翅飞，如漫漫柳絮狂。剪冰花旋风儿飘荡，践琼瑶脚步儿匆忙。用白襦两袖遮，将乌纱小帽荡。猛回头把凤楼凝望，全不见碧琉璃瓦鹞鸳鸯。一霎儿九重宫阙如银砌，半合儿万里乾坤似玉妆，粉填满封疆。

（云）行了这一会，面前是丞相府了。呀！关了门也。（唱）

【倘秀才】 则见他铁桶般重门掩上，我将这铜兽面双环扣响。（做敲门科，张千问云）甚么人敲门？（正末唱）敲门的是万岁山前赵大郎。（张千云）这早晚夜又深，雪又大，来作甚么？（正末唱）堂中无客伴，（张千云）俺老爹看书哩。（正末唱）灯下看文章，（张千云）你来有甚事？（正末唱）特来听讲。



(张千云)你要听讲，当往法堂中寻和尚去，你错走了门了。(正末唱)

【呆骨朵】 冲寒风冒瑞雪来相访，(张千云)有甚么紧急事，你说。(正末唱)有机密事紧待商量。(张千报云)老爹，门外有人叫门。(普云)你问他是谁？(张千云)他说是赵大官人，有机密事来商议。(普做慌科，云)快开门，快开门！(普见驾，跪云)不知主上幸临，有失远接。(张千慌走科)(正末唱)忙怎么了事公人？(普又拜云)恕微臣之罪。(正末唱)免礼波招贤宰相。(正末问张千云)这是那里？(张千云)这就是俺丞相厅房。(正末云)怎么使你这般样人？(唱)正是调鼎鼐三公府，那个是剃头发杨和尚？(普云)陛下尊坐。(正末唱)我向坐席间听讲书。(张千云)老爹，酒食已备。捧上来罢？(正末唱)你休来耳边厢叫点汤。

(正末云)夜深人静，张千好生看着相府门者。(普云)主公，今夜天气甚寒，不求安逸，冒雪而来，却是为何？(正末唱)

【倘秀才】 朕不学汉高皇深居未央，朕不学唐天子停眠晋阳，常则是翠被寒生金凤凰。有心思传说，无梦到高唐，(普云)主公贵为天子，富有四海，尚不肯逸豫。(正末唱)这是俺为君的勾当。

(背云)寡人颇通文墨，试问丞相一问。(问云)寡人间



卿，卿试听者。

【滚绣球】 既然主四海为一人，必须正三纲谨五常。寡人呵，幼年间广习枪棒，恨未曾登孔子门墙。《尚书》是几篇？（普云）《尚书》者上古《三坟》《五典》，洪荒莫考。夫子断自唐虞，以典、谟、训、诰、誓、命六体，皆尧、舜、汤、禹、文、武授受之心法。孔安国断为五十八篇，帝王治世之书也。（正末唱）毛诗共几章？（普云）夫诗者，古人吟咏性情之大节。有风、雅、颂三经，赋、比、兴三纬。诗有三千，夫子删为三百十一篇，善以为劝，恶以为戒。（正末云）《礼记》主意如何？（普云）夫《礼记》乃汉儒所撰述，杂录古礼之义。盖六经之用，礼实为先；治人事神，无非以礼。日用之间，不可斯须少者。（正末唱）讲《礼记》始知谦让。《春秋》主意如何？（普云）《春秋》以褒贬为辞，敦典庸礼，命德讨罪，世道之兴亡可鉴。（正末唱）论《春秋》可鉴兴亡。（普云）陛下法宗尧、舜、禹、汤、文、武，方为圣主。（正末唱）朕待学禹汤文武宗尧舜，（普云）臣有愧于古之贤相也。（正末唱）卿可继房杜萧曹立汉唐，燮理阴阳。

（正末指桌上书，问云）卿看的是甚么书？（普云）是《论语》。（正末笑云）寡人闻童子入学，先读《论语》，卿何故也看他？（普云）《论语》乃孔门弟子记圣人的切要言语，皆治国平天下之要道。臣用半部，佐我主平治天下。（正末唱）

